



神僧傳卷第四

慧通

釋慧通不知何許人。宋元嘉中見在壽春。寢宿無定。遊歷村里。飲讌食。不異恒人。常自稱鄭散騎。言未然之事。頗時有驗。江陵有邊僧。歸者遊。賈壽春。將應反鄉。路值慧通。稱欲寄物。僧歸時。自負重擔。固以致辭。遂強置擔上。而了不覺重。行數里。便別去。謂僧歸曰。我有姊在江陵。作尼。名慧緒。住三層寺。君可為我相聞。道尋欲往。言訖。忽然不見。顧視擔上。所寄物亦失。僧歸既至。尋得慧緒。具說其意。緒既無此弟。亦不知何以而然。乃自往壽春。尋之。竟不相見。通後自往江陵。而慧緒已死。入其房中。訊問。委悉。因留江陵。少時。路由人家墳墓。無不悉。

其氏族死亡年月。傳以相問。並如其言。或時懸指偷劫。道其罪狀。於是羣盜遙見通者。輒間行避走。又於江津路值一人。忽以杖打之。語云。可駛歸去。看汝家若為此。人至家。果延火所及。舍物蕩盡。齊永元初。忽就相識。人任漾求酒甚急。云。今應遠行。不復相見。為謝諸知識。並宜精勤脩善。為先飲酒畢。至墻邊卧地。就看已死。後數十日。復有人於市中見之。追及共語。久之乃失。

邵頌

沙門邵頌。康居國人。與誌公最善。出入經行。不問夜旦。意欲求之。則去。遊益州。以滑稽言事。能發人懽笑。因勸以善。家家喜之。至人家眠地者。家必有死。就人求細席者。必有小兒亡。時咸以此為讖。至四月八日。成都行化。

碩於眾中作師子形。爾日郫縣亦言。見碩作師子形。乃悟分其身也。刺史蕭慧開及劉孟明皆挹事之。孟明以男子衣衣二妾。試碩云。以此二人。給公為左右。可乎。碩為人好韻語。乃謂明曰。寧自乞食。以清謙。不能與阿夫竟殘年。後忽著布帽。詣明。少時明卒。先是孟明長史沈仲玉。改鞭杖之格。嚴重常科。碩謂玉曰。天地嗷嗷。從此起。若除鞭格。得刺史。玉除之。及明卒。仲玉果行州事。是年九月。將亡。謂沙門法進曰。願露骸松下。然脚須著履。進諾之。已而化。昇其尸。露之。明日往視。失所在。俄有自郫縣來者。曰。昨見碩公。著一履行市中。曰。為我語進公。小兒見欺。止為我隻履。進驚問之。沙彌荅曰。昇尸時。一履墮。行急不及繫也。

法頴

釋法頴本姓鍾氏名武厲先穎川長社人祖世避難移居吳興長城家本事神身習鼓舞世間雜伎及著百支占相備盡其妙嘗以鏡照面云我不久當見天子於是出都住沈橋以傭相自業宗殼沈慶之微時請頴相頴曰宗君應為三州刺史沈公當位極三公如是歷相衆人記其近事所驗非一遂有聞於宋太祖太祖見之取東治囚及一奴美顏色者飾以衣冠令頴相之頴指囚曰君多危難下階便應鉗鎖謂奴曰君是下賤人乃暫得免耶帝異之勅住後堂知陰陽秘術後少時啓求出家三啓方遂為上定林遠公弟子及孝武龍飛宗殼出鎮廣州攜頴同往奉為五戒之師會譙王構逆殼以詔頴頴曰隨君來誤殺人今太白犯南斗法應殺大臣宜速改計必得大勲果如頴言殼遷豫州刺史復攜同行及竟陵王誕舉事陳諫亦然齊高帝親事幼主恒有不測之憂每以詔頴頴曰後七月當定果如其言及高帝即位事以師禮武帝嗣興亦盡師敬永元二年卒春秋八十二

寶誌

釋寶誌本姓朱氏金城人初朱氏婦聞兒啼鷹巢中梯樹得之舉以為子七歲依鍾山僧儉出家修習禪業往來皖山劔水之下面方而瑩徹如鏡手足皆鳥爪止江東道林寺至宋大始初忽如僻異居止無定飲食無時髮長數寸常跣行街巷執一錫杖杖頭掛剪刀及鏡或掛一兩匹帛齊建元中稍見異迹數日不食亦無飢

容與人言。始若難曉。後皆效驗。時或賦詩。言如讖記。江東士庶皆共事之。齊武帝謂其惑衆。收駐建康。既旦。人見其入市。還檢獄中。誌猶在焉。誌語獄吏。門外有兩舉食。來金鉢盛飯。汝可取之。既而齊文惠太子竟陵王子良並送食餉誌。果如其言。建康令呂文顯以事聞。武帝即迎入宮。居之後堂。一時屏除內宴。誌亦隨衆出。既而景陽山上猶有一誌。與七僧俱。帝怒。遣推檢其所。閤吏啓云。誌久出在省方。以墨塗其身。時僧正法獻欲以一衣遺誌。遣使於龍光罽賓二寺求之。並云。昨宿且去。又至其常所造。厲候伯家尋之。伯云。誌昨在此行道。旦眠未覺。使還以告獻。方知其身分三處宿焉。誌常盛冬袒行。沙門寶亮欲以衲衣遺之。未及發言。忽來引衲而去。後假齊武帝神力。使見高帝於地下。常受錐刀之苦。帝自是永廢錐刀。武帝又常於華林園召誌。誌忽著三重布帽以見。俄而武帝崩。文惠太子及豫章王相繼而薨。永明中。常住東宮後堂。一日平明。從門出入。忽云。門上血汙衣。褰衣走過。及鬱林見害。車載出。此帝頸血流於門限。齊衛尉胡諧疾病。請誌。誌注疏云。明屈。明日竟不往。是日諧亡。載屍還宅。誌曰。明日屍出也。齊太尉司馬殷齊之。隨陳顯達鎮江州。辭誌。誌畫紙作樹。樹上有烏。語云。急時可登此。後顯達逆節。留齊之鎮州。及敗齊之叛入廬山。追騎將及齊之。見林中有一樹。樹上有烏。如誌所畫。悟而登之。烏竟不飛。追者見烏。謂無人而返。卒以見免。齊屯騎桑偃將欲謀反。往詣誌。誌遙見而走。大

呼云。圍臺城欲反逆。斫頭破腹。後又旬事發。偃叛走朱方。為人所不得。果斫頭破腹。梁都陽忠烈王嘗屈誌至第。忽令覓荆子甚急。既得安之門上。莫測所以。少時王出。為荊州刺史。其預鑒之明。此類非一。誌多去來興皇淨名兩寺。及梁武即位。下詔曰。誌公迹均塵垢。神遊冥寂。水火不能焦濡。蛇虎不能侵懼。語其佛理。則聲聞以上。談其隱淪。則遁仙高者。豈得以俗士常情。空相拘制。何其鄙陋。一至於此。自今行來。隨意出入。勿得復禁。誌自是多出入禁中。嘗於臺城對梁武帝。喫鱸。昭明諸王子皆侍側。食訖。武帝曰。朕不知味二十餘年矣。師何為爾。誌公乃吐出小魚。依依鱗尾。武帝深異之。如今秣陵尚。有鱸殘魚也。天監五年冬。旱。雩祭備至而未降雨。誌忽上啓云。誌病不差。就官乞活。若不啓白官。應得鞭杖。願於華光殿講勝鬘經。請雨。梁武即使沙門法雲講勝鬘。竟夜便大雨。誌又云。湏一盆水。加刀其上。俄而雨大降。高下皆足。舒州瀟山最奇絕。而山麓尤勝。誌公與白鶴道人皆欲之。天監六年。二人俱白武帝。帝以二人皆具靈通。俾各以物識其地。得者居之。道人云。某以鶴止處為記。誌云。某以卓錫處為記。已而鶴先飛去。至麓將止。忽聞空中錫飛聲。誌公之錫遂卓於山麓。而鶴驚止。它所道人。不懌然。以前言不可食。遂各以所識築室焉。有陳征虜者。舉家事誌。甚薦。誌嘗為其見真形。光相如菩薩像焉。誌知名顯奇。四十餘載。士女供事者不可勝數。然好用小便濯髮。俗僧間有譏笑者。誌亦知眾僧多不

斷酒肉。譏之者飲酒食豬肚。誌勃然謂曰。汝笑我以溺洗頭。汝何為食盛糞袋。譏者懼而慙服。晉安王蕭綱初生日。梁武遣使問誌。誌合掌云。皇子誕育。幸甚。然冤家亦生。於後推尋曆數。與侯景同年月日而生也。會稽臨海寺有大德常聞揚州都下有誌公。語言顛狂。放縱自在。僧云。必是狐狸之魅也。願向都下覓獵犬以逐之。於是輕船入海。趨浦口。欲西上。忽大風所飄。意謂東南。六七日始到一島中。望見金裝浮圖。千雲秀出。遂尋徑而往。至一寺院。宇精麗。花卉芳菲。有五六僧。皆可年三十。美容色。並著真緋袈裟。倚杖於門樹下。言語僧云。欲向都下。為風飄蕩。不知上人此處。知何州國。今四望環海。恐本鄉不可復見。答曰。必欲向揚州。即時便到。今附書到鍾山寺。西行南頭第二房。覓黃頭付之。僧因閉目坐船。風聲定。開眼。如言奄至西岸。入浦數十里。至都。往往鍾山寺訪問。都無字。黃頭者。僧具說委曲。報云。西行南頭第二房。乃風病道人誌公。雖言配在此寺。常在都下聚樂處。百日不一度來。房空無人也。問答之間。不覺誌公已在寺厨上。乘醉索食。人以齋過。日晚。未與間。便奮身惡罵。寺僧試遣沙彌繞厨側。漫叫黃頭。誌公忽曰。阿誰喚我。即逐沙彌來。到僧處。謂曰。汝許將獵狗捉我。何為空來。僧知是非常人。頂禮懺悔。授書與之。誌公看書云。方丈道人喚我。不久當亦自還。誌公遂屈指云。某月日去。便不復共。此僧語衆。但記某月日。至天監十三年冬。於臺後堂。謂人曰。菩薩將去。未及旬日。無疾而終。屍

骸香軟。形貌熙悅。臨亡然一燭。以付後閻舍人吳慶慶。即啓聞。梁武歎曰。大師不復留矣。燭者將以後事屬我乎。因厚加殯。送葬于鍾山獨龍之阜。仍於墓所立開善寺。勅陸倕製銘於塚內。王筠勒碑文於寺門。傳其遺像。處處存焉。

香閣梨

香閣梨者。莫測其來。止益州青城山寺。時俗每至三月三日。必往山遊賞。多將酒肉酣樂。香屢勸之不斷。後因三月。又如前集。香令人穿坑。方丈許。忽曰。檀越等嘗自飲。敢未曾與香。今日酒食一頓。諸人爭奉。殺酒。隨得隨盡。若填巨壑。至晚曰。我大醉飽。扶我就坑。不爾汙地。及至坑所。張口大吐。雉肉自口出。即能飛鳴。羊肉自口出。即能馳走。酒肉亂出。將欲滿坑。魚鮓鵝鴨游泳交錯。衆咸驚嗟。誓斷宰殺。自後酒肉永絕上山。此香之風德也。後因誌公寄語。遂化于寺。弟子營墓。將殯。恠棺大輕。及開。止見几杖而已。

道琳

釋道琳。本會稽山陰人。少出家。有戒行。善涅槃法華。誦淨名經。吳國張緒禮事之。後居富陽縣林泉寺。常有鬼恠。自琳居之。則消。琳弟子慧韶為屋所厭。頭陷入胸。琳為祈請。韶夜見兩胡道人。拔出其頭。旦起。遂平復。琳於是設聖僧齋。鋪新帛於床上。齋畢。見帛上有人迹。長三尺餘。衆咸服其徵感。富陽人始家家立聖僧坐。以飯之。至梁初。琳出居齊熙寺。天監十八年卒。春秋七十有三。

嵩頭陀

嵩頭陀法師居婺州雙林北四十里巖谷間為創香山寺及建靈刹。道俗萬眾共引麻紵舉刹。紵忽中斷。引者皆顛躓。師乃曰。有何魔事。使之然乎。因以鉢盛淨水。內外攪之。呪而作禮。捧鉢繞刹一周。刹乃不假人功。屹然自立。後又至萊山立寺。師常曰。萊山王而不久。香山久而不王。後果如其所言。竟不知所終。

阿專師

阿專師者。不詳其氏族。雲遊定州。時在州里中。聞人有會社齋供。嫁娶喪葬之席。或少年放鷹走狗。追隨宴集之處。未嘗不在其間。鬪諍誼罵。亦曲助朋黨。如此多年。後正月十五夜。觸他長幼坐席。惡口聚罵。主人欲打殺之。市道之徒。救解將去。其家兄弟。明旦捕覓。正見阿專師騎一破牆上坐。喜笑謂之曰。汝等此間何厭賤我。我捨汝去。捕者奮杖欲擲。前人復遮約。阿專復云。定厭賤我。我去。以杖擊牆。口唱叱叱。所騎之牆。一堵忽然昇上。可數十仞。舉手謝鄉里曰。好住。百姓見者。無不禮拜。悔咎。須臾映雲而滅。可經一年間。在長安還如舊態。於後不知所終。

達磨

菩提達磨。南天竺婆羅門種。神慧踈朗。聞皆曉悟。志存大乘。冥心虛寂。通徹數定。學高之。梁武帝親問曰。朕即位以來。造寺捨經。度僧不可勝數。有何功德。師曰。並無

功德。帝曰：何以並無功德？師曰：此但人天小果，有漏之因。雖有非實。帝曰：如何是真功德？師曰：淨智妙圓，體自空寂。如是功德，不以世求。帝問：如何是聖諦第一義？師曰：廓然無聖。帝曰：對朕者誰？師曰：不識。帝不省玄旨。師知機不契，十九日遂去梁，折蘆一枝渡江。二十三日北趨魏境，尋至雒邑，初止嵩山少林寺，終日面壁而坐。九年遂逝焉。葬熊耳山。魏宋雲奉使西域，迴遇師于葱嶺，見手携隻履，翩翩獨逝。雲問何去，曰：西天去。又謂雲曰：汝主已厭世，雲聞之茫然。別師東邁，暨復命，明帝已登遐矣。迨孝莊即位，雲具奏其事，帝令起壙，惟空棺一隻，革履存焉。

通公

通公道人者，不知其氏族，居處無常，所語狂譎，然必有應驗。飲酒食肉，遊行民間，侯景甚信之。揚州未陷之日，多拾無數死魚頭，積於西明門外。又拔青草荆棘，栽市里。及侯景渡江，先屠東府，一城盡斃，置其首於西明門外。為京觀焉。朝市破落，所在荒蕪耳。通公言說得失，於景不便。景惡之，又憚非常人，不敢加害。私遣小將于子悅，將武士四人往候之。景謂子悅云：若知殺者，勿害。不知則密捉之。子悅立四人於門外，獨入見通，脫衣火燎，逆謂子悅曰：汝來殺我，我是何人？汝敢輒殺？子悅作禮拜云：不敢。於是馳往報景。景禮拜謝之，卒不敢害。景後因宴召通，通取肉搗鹽以進。於景問曰：好否？景曰：太鹹。通曰：不鹹則爛。及景死數日，衆以鹽五石置腹中，送屍

于建康市。百姓爭屠膾羹。食皆盡。後竟不知所去。

僧林

釋僧林。吳人。深有德素。行能動物。梁大同中。上蜀至潼州。城西北百四十里。有豆圖山。上有神祠。土民敬之。每往祭謁。林往居之。禪默累日。忽有大蟒縈繩。林前舉頭。如揖讓者。林為授三歸。受已便去。自尔安恬。卒無災異。其山北涪水之陽。素來無猿。自林棲托已來。便有兩頭。依林而住。有初見者。云度水來。及後林出山門。猿還泗渡。如此非一。年月淹久。孚乳產生。乃有數十。有時送林至龍門口。竚望而返。後住赤水巖。故寺中屋宇並摧。止有叢林。便即露坐。有虎蹲於林前。低目視林。乃為說法。良久便去。尔後孤遊。雄悍不避惡獸。常行仁濟。感化極多。未卒于潼郡。

慧約

釋慧約。字德素。姓婁氏。東陽烏傷人也。祖世為東南仕族。有占其塋墓者云。後世當有苦行得道者。為帝王師焉。母留氏。夢長人擎金像令吞之。又見紫光繞身。因而有孕。便覺精神爽發。思理明悟。及載誕之日。光香充滿。身白如雪。俗因名為靈粲。兒童時。聚沙為佛塔。壘石為高座。七歲便求入學。即誦孝經論語。乃至史傳。披文見意。宅南有果園。隣童競採。常以為患。乃捨己所得。空拳而返。鄉土以蠶桑為業。常懷悲惻。由是。不服繅纈。季父喜畋獵。化終不改。常歎曰。飛走之類。去人甚遠。好生惡死。此情何別。乃絕羶腥。叔父遂避於他里。恣行勦戮。夢

赤衣使者手持矛戟。謂曰。汝終日殺生。菩薩教化。又不能止。捉來就死。驚覺汗流。且便毀諸獵具。深改前咎。約復至常所獵處。見麋鹿數十頭。騰倚隨船。若有愧謝者。所居僻左。不嘗見寺。忽值一僧。訪以至教。彼乃舉手東指。云。剡中佛事甚盛。因仍不見。方悟神人。至年十二。始遊于剡。徧禮塔廟。肆意山川。遠會素心。多究經典。宋泰始四年。於上虞東山寺。辭親剪落。時年十七。事南林寺沙門慧靜。隨靜住剡之梵居寺。服勤就養。年踰一紀。及靜之亡。盡心喪之禮。服闋之後。却粒巖栖。餌以松木。蠲疾延年。深有成益。齊太宰文簡公褚淵。嘗請講淨名勝鬘。淵遇疾。晝寢。見梵僧云。菩薩當至。尋有道人來者。是也。俄而約造焉。遂豁然病愈。即請受五戒。齊給事中婁幼瑜。少有學術。約之族祖也。每見輒起為禮。或問此乃君族下班。何乃恭耶。瑜曰。菩薩出世。方師於天下。豈老夫致敬而已。時人未喻此旨。惟王文憲深以為然。後還都。又住草堂。少傳沈約。隆昌中外任。攜與同行。在郡。惟以靜漠自娛。禪誦為樂。異香入室。猛獸馴階。常入金華山採結。或停赤松澗。有道士丁德靜。於館暴亡。傳云。山精所斃。乃要大治祭酒居之。妖猶充斥。長山令徐伯超立議。請約移居。曾未決旬。而神魅弭息。後晝卧。見二青衣女子。從澗水出。禮悔云。夙障深重。墮此水精。晝夜煩惱。即授以歸戒。自爾灾恠永絕。天監十八年。己亥。四月八日。天子發弘誓心。受菩薩戒。乃幸等覺殿。皇儲已下。爰至道俗士庶。咸希度脫。弟子著錄者。凡四萬八千人。

嘗受戒時。有一乳鵲。歷階而昇。狀若餐受。至說戒畢。然後飛騰。又嘗述戒。有二孔雀。驅斥不去。勅乃聽上。徐行至壇。俛頸聽法。上曰。此鳥必欲滅度。別受餘果。矜其至誠。更為說法。無何。二鳥同化。後靜居閑室。忽有野媪。賫書數卷。置經案上。無言而出。并持異樹。自植於庭。云。青庭樹也。約曰。此書美也。不俟看之。如其惡也。亦不勞視。經七日。又見一叟。請書而退。此樹葉綠。花紅。扶疏尚在。又感異鳥。身赤尾長。形如翡翠。相隨棲息。出入樹間。大通四年。夢見舊宅。白壁朱門。赫然壯麗。仍發願造寺。詔乃號為本生焉。又勅改所居竹山里為智者里。大同元年八月。使人伐門外樹枝。白輦駕當來。勿令妨路。人未之測。至九月六日。現疾。此首右脅而卧。神識恬愉。了無痛惱。謂弟子曰。我夢四部大衆。幡花羅列空中。迎我凌雲而去。福報當訖。至十六日。勅遣舍人徐儼。參疾。答云。今夜當去。至五更二唱。異香滿室。左右肅然。乃曰。夫生有死。自然恒數。勤脩念慧。勿起亂想。言畢。合掌便入涅槃。春秋八十有四。六十三夏。初卧疾時。見一老公。執錫來入。及遷化日。諸僧咸卜寺之東巖。帝乃改葬。獨龍抑其前。見之叟。則誌公相迎者乎。又臨終夜。所乘青牛。忽然鳴吼。淚下交流。至葬日。勅使牽從部伍。發寺至山。吼淚不息。又建塔之始。白鶴一雙。繞墳鳴唳。聲甚哀惋。葬後三日。歛然永逝。

檀特師

檀特師一名惠豐。身為比丘。不知何處人也。飲酒啖肉。

神仙傳卷四
十一
語默無常。逆論來事後皆如言。居於涼州。宇文仲和為刺史。請之至州內。歷觀廐庫。乃云何意畜他官馬官物。仲和不喻其旨。怒不令在涼州。未幾。仲和拒不受代。朝廷令獨孤信禽之。仲和身死。資財沒官。周文遣書召之。檀特發至岐州。會齊神武來寇。玉壁。檀特曰。狗豈能至龍門也。神武果不至龍門而返。侯景未叛東魏之前。忽捉一杖。杖頭刻為獼猴形。令其面常向西。日夜弄之。又索一角弓。牽挽之。俄而景啓降。尋復背叛。人皆以為驗。至大統十七年春初。忽著一布帽。周文左右驚問之。檀特曰。汝亦著。王亦著也。至三月而魏文帝崩。復取一白絹帽著之。左右復問之。檀特曰。汝亦著。王亦著也。未幾丞相夫人薨。後又著白絹帽。左右復問之。云。汝亦著。王亦著也。尋而丞相第二兒武邑公薨。其事驗多如此也。俄而疾卒。周文命葬之。

植相

釋植相。姓郝氏。梓潼涪人。嘗任巴西郡吏。太守鄭貞令相賫獻物下揚都。見梁祖王公。崇敬佛教。便願出家。及還蜀。決誓家屬并其妻子。既同相志。一時剪落。自出家後。專習苦行。一食常坐。正心佛理。以命自期。時南武郡有法愛道人。高術道術。相往觀之。愛於夕中。自以咒力現一大神。身著衣冠。容相瑰偉。來舉繩床。離地四五尺。便誦戒神。即馳去。斯頃復來。舉床僅動一角。如前復去。俄尔又來。在相前立。相正意貞白。初無微動。尋爾復去。於屋頭現面。舍棟破裂。其聲甚大。相亦無懼。神見不動。便

來禮拜。求哀懺悔。至旦語愛曰。汝所重者。此是邪術。非正法也。可捨之。相因行路。寄宿道館。道士有素聞相名。恐化徒屬。拒不延之。其夜羣虎遶院相吼。道士等通夕不安。及明追之。從受菩薩戒焉。又曾行弘農水側。見人垂釣。相勸止之。不從其言。即唾水中。忽有大蛇擊頭。四顧來趣釣者。因即歸命。投相出家。後因梁末軍亂。入青城山。聚徒集業。未暇經始。適便遷化。初相置足於綿州城西栢林寺院宇成就。於堂頭植梧桐一株。極為繁茂。夏月忽無故葉落。又維那旦打鐘。初不發聲。大小疑怪。不測所以。上座僧謂有大變。執錫逃避。湏臾信報相已終。乃知樹枯鍾噓。表其遷化之晨也。弟子嚙命露屍松下焉。

陸法和

陸法和。不知何許人也。隱於江陵百里洲。衣食居處。一與戒行沙門同。耆老自幼見之。容色常定。人莫能測也。或謂出自嵩高。遍遊遐邇。既入荊州。汶陽郡。居高要縣之紫石山。無故捨所居山。俄有蠻賊文道期之亂。時人以為預見萌兆。及侯景始告降於梁。法和謂南郡朱元英曰。貧道共檀越擊侯景去。元英曰。侯景為國立效。師云擊之何也。法和曰。正自如此。及景度江。法和時在清谿山。元英往問曰。景今圍城。其事云何。法和曰。凡人取果。宜待熟時。固問之曰。亦剋亦不剋。景遣將任約擊梁湘東王於江陵。法和乃詣湘東乞征約。召諸蠻弟子八百人。在江津。二日便發。湘東遣胡僧祐領千餘人與同。

行。法和登艦大笑曰：無量兵馬。江陵多神祠，人俗恒所祈禱。自法和軍出，無復一驗。人以為神皆從行故也。至赤沙湖，與約相對。法和乘輕舟，不介冑，泅流而下。去約軍一里，乃還。謂將士曰：卿觀彼龍睡不動，吾軍之龍甚自踴躍，即攻之。若得彼明日，當不損客主一人而破賊。然有惡處，遂縱火船而逆風，不便。法和執白羽扇，麾風。風即返，約眾皆見。梁兵步於水上，於是大潰，皆投水。約逃竄不知所之。法和曰：明日午時當得。及期而未得人，問之。法和曰：吾前於此洲水乾時，建一刹，語檀越等：此雖為刹，實是賊標。今何不向標下求賊也。如其言，果於水中見約，抱刹仰頭，裁出鼻，遂禽之。約言求就師，目前死。法和曰：檀越有相，必不兵死。且於王有緣，決無他慮。王於後當得檀越力耳。湘東果釋用為郡守。及魏圍江陵，約以兵赴救。力戰，馬法和既平，約往進見。王僧辨於巴陵謂曰：貧道已却侯景一辭，其更何能為。檀越宜即逐取。乃請還。謂湘東王曰：侯景自然平矣，無足可慮。蜀賊將至，法和請守巫峽，待之。乃撻諸軍而往，運石以填江。三日水遂不流，橫之以鐵鎖。武陵王紀果遣蜀兵來度。峽口勢蹙，進退不可。王綝與法和經略，一戰而殄之。軍次白帝，謂人曰：諸葛孔明可謂為名將，吾自見之。此城旁有其埋弩箭鏃一斛許，因挿表令掘之。如其言。又嘗至襄陽城北，大樹下畫地方二尺，令弟子掘之。得一龜，長尺半，以杖叩之。曰：汝欲出，不能得。已數百歲，不逢我者，豈見天日乎。為授三歸龜，乃入草。初八疊山多惡。

疾人。法和為采藥療之。不過三服皆差。即求為弟子。山中多毒蟲猛獸。法和投其禁戒。不復噬螫。所泊江湖。必於峯側結表。云。此處放生。漁者皆無所得。才或少獲。輒有大風雷。船人懼而放之。風雨乃定。晚雖將兵。猶禁諸軍漁捕。有竊違者。中夜猛獸必來欲噬之。或亡其船。纜有小弟子戲截蛇頭。來詣法和。法和曰。汝何意殺。因指以示之。弟子乃見蛇頭斷。袴褶而不落。法和使懺悔。為蛇作功德。又有人以牛試刀。一下而頭斷。來詣法和。法和曰。有一斷頭牛。就卿徵命。殊急。若不為作功德。一月內報至。其人弗信。少日果死。法和又為人置宅。相墓。以避禍求福。嘗謂人曰。勿繫馬於碓。其人行過鄉曲。門側有碓。因繫馬於其柱。入門中。憶法和戒。走出將解之。

馬已斃矣。梁元帝以法和為都督。郢州刺史。封江乘縣公。法和。不稱臣。其啓文。朱印名上。自稱居士。後稱司徒。梁元帝謂其僕射王褒曰。我未嘗有意用陸為三公。而自稱何也。褒曰。彼既以道術自命。容是先知。梁元帝以法和功業稍重。遂就加司徒。都督。刺史如故。部曲數千人。通呼為弟子。唯以道術為化。不以法獄加人。又列肆之所。不立市。丞牧佐之法。無人領受。但以空檻。齋在道間。上開一孔。以受錢。賈客店人。隨貨多少。計其估限。自委檻中。所受所掌之司。夕方開取。條其孔目。輸之於庫。又法和平常言。若不出口。時有所論。則雄辯無敵。然猶帶蠻音。善為攻戰具。在江夏。大聚兵艦。欲襲襄陽。而入武關。梁元帝使止之。法和曰。法和是求佛之人。尚不希

釋梵天王坐處豈規王位。但於空王佛所。與主上有香火因緣。見主上應有報至。故救援耳。今既被疑。是業定不可解也。於是設供食。具大饀薄餅。及魏舉兵法。和自郢入漢口。將赴江陵。梁元帝使人逆之。曰。此自能破賊。師但鎮郢州。不須動也。法和乃還州。堊其城門。著麤白布衫袴。邪巾大繩束腰。坐葦席。終日乃脫之。及聞梁元敗滅。復取前凶服。著之。哭泣受平。梁人入魏。果見饀餅。馬。法和始於百里洲造壽王寺。既架佛殿。更截梁柱。曰。後四十許年。佛法當遭雷電。此寺幽僻。可以免難。及魏平荊州。宮室焚燼。搃管欲毀取壽王佛殿。嫌其材短。乃停。後周氏滅佛法。此寺隔此陳境。故不及難。天保六年春。清河王岳進軍臨江。法和舉州入齊。文宣以法和為

大都督十州諸軍事。大尉公。西南大都督五州諸軍事。荊州刺史。安湘郡公。宋蒞為郢州刺史。官爵如故。蒞弟造為散騎常侍儀同三司。湘州刺史。義興縣公。梁將侯瑱來逼江夏。齊軍棄城而退。法和與宋蒞兄弟入朝。文宣聞其有奇術。虛心想見之。備三公鹵簿於城南十二里。供帳以待之。法和遙見鄴城。下馬禹步。辛術謂曰。公既萬里歸誠。主上虛心相待。何作此術。法和手持香鑪。步從路車。至於館。明日引見。給通幘油絡網車。詣闕。通名。不稱官爵。不稱臣。但云荆山居士。文宣宴法和及其徒。屬於昭陽殿。賜法和錢百萬。物萬段。甲第一區。田一百頃。奴婢二百人。生資什物。稱是法和所得。奴婢盡免之。曰。各隨緣去。錢帛散施。一日便盡。以官所賜宅營佛

寺自居一房與凡人無異。三年間再為太尉。世猶謂之居士。無疾而告弟子死期。至時燒香禮拜佛。坐繩床而終。浴訖將殮。屍小縮。止三尺許。文宣令開棺視之。空棺而已。法和書其所居屋壁而塗之。及剝落。有文曰。十年天子為尚可。百日天子急如火。周年天子過代坐。又曰。一母生三天。兩天共五年。說者以婁太后生三天子。自孝昭即位。至武成傳位。後主共五年焉。

尚圓

釋尚圓。姓陳氏。廣漢人。出家以呪術救物。梁武陵王蕭紀宮中鬼怪魅諸綠女。或歌或哭。紛然亂舉。王乃令善射者控弦擬之。鬼乃現形。即放箭射鬼。便遙接還。返擲人。久而不已。聞圓持呪。請入宮中。諸鬼競作諸變現。龍

蛇百獸。倏忽前後。在空中在地。怪變多端。圓安坐告曰。汝小家鬼。何因敢入王宮。能變我身。則可自變萬種。祇是小鬼。可住聽我。一言。諸鬼合掌住立。圓始發云。南無佛陀。鬼皆失所在。自爾安靜。武帝聞召大蒙賞遇。年八十一。終所住城。

法聰

釋法聰。姓梅氏。南陽新野人。八歲出家。卓然神秀。正性貞潔。身形如玉。蔬藿是甘。無求滋饌。因至襄陽。傘蓋山白馬泉。築室方丈。以為栖止之宅。入谷兩所。置蘭若舍。今廵山者。尚識故基焉。初梁晉安王來都。襄雍承風。來問。將至禪室。馬騎將從。無故却退。主慙而返。夜感惡夢。後更再往。馬退如故。王乃潔齋。躬盡虔敬。方得進見。初

至寺側但覩一谷猛火洞然良久佇望忽變為水經停
傾仰水滅堂現以事相詢乃知爾時入水火定也堂內
所坐繩床兩邊各有一虎王不敢進聰乃以手按頭著
地閉其兩目召王令前方得展禮因告境內多被虎災
請求救援聰即入室湏臾有十七大虎來至便與受三
歸戒勅勿犯暴百姓又命弟子以布故衣繫諸虎頭滿
七日已當來於此王至期日設齋衆集諸虎亦至便與
食解布遂爾無害其日將王臨白馬泉內有白龜就聰
手中取食謂王曰此是雄龍又臨靈泉有五色鯉亦就
手食云此雌龍王與羣吏嗟賞其事天施而旋有凶黨
左右數十人夜來劫所施之物遇虎哮吼遮遏其道又
見大人倚立禪室傍有松樹止至其膝執金剛杵將有
守護竟夜迴遑日午方返王恠其來晚方以事首遂表
奏聞下勅為造禪居寺聰不往住度人安之聰住禪堂
每有白鹿白雀馴伏栖止行往所及慈救為先忽遇屠
者驅猪百餘頭聰三告曰解脫首楞嚴猪遂繩解散去
諸屠大怒將事加手並屹然不動便歸過悔罪因斷殺
業又於漢水漁人牽網所如前三告引網不得方復歸
心空網而返又荊州告旱長沙寺遣僧至聰所請雨使
還大降陂池皆滿湘東王承聞馳駕山門伸師襄之禮
頻請下都固辭不許乃捨宮造天宮寺邀延永住巴峽
守晉鴻上湘東王栢木為寢殿及感放光旬日不歇王
於傍造浮圖僧房講堂并王服玩作露盤立為寶光寺
請聰居之王述般若義每明日將豎義殿則夜放光明

照數里不假燈燭。議者以般若大慧智光幽燭所致。以梁大定五年九月無疾而化。端坐如生。形柔頂暖。手屈二指。異香不散。年九十二。

僧安

釋僧安不知何許人。戒業精苦。坐禪講解。時踰多能。齊文宣時在王屋山聚徒二十許人。講涅槃。始發題有雌雉來座側伏聽。僧若食時出外飲啄。日晚上講。依時赴集。三卷未了。遂絕不至。衆咸怪之。安曰。雉今生人道。不須怪也。武平四年安領徒衆至越州行頭陀。忽云往年雌雉應生此。徑至一家。遙喚雌雉。一女走出如舊相識。禮拜歡喜。女父母異之。引入設食。安曰。此女何故名雌雉耶。答曰。見其初生髮如雉毛。既是女。故名雌雉也。安大笑。為述本緣。女聞涕泣。苦求出家。二親欣然許之。為講涅槃。便領解。一無遺漏。至後三卷茫然不解。

傳弘

大士傳弘者。住東陽郡烏傷縣雙林寺。體權應道。躡嗣維摩。時或分身濟度。為任。依止雙林。導化法俗。或金色表於胸臆。異香流於掌內。或見身長丈餘。臂過於膝。腳長二尺。指長六寸。兩目明亮。重瞳外耀。色貌端峙。有大人之相。梁孝武聞之。延住建業。乃居鍾山下定林寺。坐蔭高松。卧依磐石。四澈六旬。天花甘露。恒流於地。帝後於華林園重雲殿。開般若題。獨設一榻。擬與天旨對揚。及玉輦昇殿。而公晏然其坐。憲司譏問。但云法地無動。若動則一切不安。且知梁運將盡。救愍兵灾。乃然臂為

炬。冀禳來禱。至陳大建元年夏中。於本州右脇而卧。奄
就昇遐。于時隆暑赫曦。而身體溫暖。色貌敷愉。光彩鮮
潔。香氣充滿。屈伸如恒。觀者發心。莫不驚嘆。遂合殮於
巖中。數旬之間。香花散積。後忽失其所在。往者不見。號
慕轉深。悲戀之聲。慟噎山谷。初大士在日。常以經目繁
多。人或不能遍閱。乃就山中。建大層龕。一柱八面。實以
諸經。運行不碍。謂之輪藏。仍有願言。登吾藏門者。生生
世世。不失人身。從勸世人。有發於菩提心者。能推輪藏。
是人即與持誦諸經功德無異。今天下所建輪藏。皆設
大士像。實始於此。山有古松。大士曾於松間。願度衆生。
以斧為誓。至今松木斧痕猶在。其飼虎之餘飯。棄擲林
間。化而為石。青白錯雜。可作數珠。謂之飯石。至今長存。
靈異之蹟。不可紀極。

慧思

釋慧思。俗姓李氏。武津人也。少以弘恕慈育。知名閭里。
常夢梵僧勸令出俗。駭悟斯瑞。辭親入道。數夢神僧勸
令齋戒。唯一食。不食別供。所止庵舍。野人焚其所居。遂
顯癘疾。求誠懺悔。所患平復。又夢梵僧數百。形服瓌異。
上座命曰。汝先受戒。律儀非勝。安能開發於正道也。既
遇清衆。宜更翻壇。祈請師僧。四十二人。加羯磨法。具足
成就。後忽驚悟。方知夢受。復夢彌勒。彌勒說法開悟。故
造二像。並同供養。又夢隨彌勒。與諸眷屬。同會法華。心
自惟曰。我於釋迦末法。受持法華。今值慈尊。豁然開悟。
轉復精進。靈瑞重沓。瓶水常滿。供養嚴備。若有天童侍

衛之者。自大蘇山將四十餘僧。徑趨南岳。既至。謂徒曰。吾寄此山。期十載以後。必事遠遊。師曰。吾前生曾居此處。領徒陟嶺。見一所林泉勝異。曰。古寺也。吾昔居之。掘地。果得僧用器皿。殿宇基址。又指兩石下。得遺骸。乃建塔。今三生塔是也。又於東畔靈岩之傍。建臺為衆講。般若法。正當大岳之心。今般若寺是也。南北學徒來者雲集。師患無水。忽見岩下潤。以錫杖卓之。果得一泉。猶未周。續有二虎引師登嶺。跑地哮吼。泉水流迸。今虎跑泉是也。或問何不下山教化衆生。一向目視雲漢。作麼。師曰。三世諸佛。被我一口吞盡。更有甚麼衆生可度者。江左佛學盛。學義門。自思南度。定慧雙舉。道風既盛。名稱普聞。俄有道士。生妬害心。密告陳主。誣師。乃北僧受齊

國券。斷岳心。釘石興妖。帝遂遣使追師。使至石橋。見二虎跑憤。大蛇當路。使驚。乃誓曰。我見思禪師。當如佛想。若起惡心。任汝所傷。虎蛇乃退。使見師。再拜以事白。未至之前。師見一小蜂來螫。其面。即為大蜂咬殺。街至師前。師入定觀之。知是宿冤。欲相燒害。師謂使曰。使者先去。負道續來。七日後。飛錫而往。四門關吏齊奏師入。帝已驚異。及師朝見。帝遂下迎。復問左右。卿等見此僧何如。人對云。常僧。帝曰。朕見其踏寶花。乘空而至。乃迎師入殿。供養。其道士罪。以欺罔。欲盡誅之。師懇帝曰。此宿冤。願陛下赦之。乃可。其奏。勅彼道士。給師役。使師奏辭還山。帝餞以殊禮。未幾。道士誣師者。一人暴死。一人為犬所齧而斃。應蜂兆矣。自是每年。陳主三信。參勞。

神僧傳卷第四
三十一
榮盛莫加而神異難測。遇雨不濕。履泥不汙。或現形大小。或寂爾藏身。是年六月。臨將終時。連日說法。苦切呵責。聞者寒心。至二十二日。屏衆泯然而逝。小師靈辨踊慟。乃開目曰。何驚動吾耶。瘞人。出去。言訖長往。

